

共同經課-1 使徒行傳十章四十四節～四十八節

44 彼得 iáu-kú teh 講 chiah-ê 話 ê 時，聖神降臨 tī 見若聽道理 ê 人。45 奉割禮 ê 信徒，kap 彼得 sa<sup>n</sup>-kap 來 ê，因為聖神 ê 賞賜亦降落 tī 外邦人，就 lóng 奇怪。46 因為聽見 in 用 chiah-ê 腔口 teh 講，koh o-ló 上帝做大。47 彼得就應講，Chiah-ê 人已經受 tiòh 聖神，親像咱一樣，chī-chūi 會禁得用水 kā in 行洗禮 ah？48 就命令 in tī 耶穌基督 ê 名受洗禮。Tùi án-ni，，請伊 toà kúi-nā 日。

共同經課-2 詩篇九十八篇

1 一篇詩。1) Lín tiòh òng 耶和華唱新 ê 歌；因為伊 bat 行奇妙 ê 事；伊 ê chià<sup>n</sup> 手，kap 伊聖 ê 手骨，已經為家已行拯救。2 耶和華 hō 人知伊 ê 拯救；Tī 列邦人 ê 目矙前顯明伊 ê 公義。3 伊記念伊 tùi 以色列家所發出 ê 慈愛 kap 信實；地 ê 四角 lóng 看見咱 ê 上帝 ê 拯救。4 全地 lóng tiòh òng 耶和華出歡喜 ê 聲；Tiòh 出大聲歡喜唱歌 o-ló 伊。5 Tiòh 彈琴唱歌 o-ló 耶和華；Tiòh 彈琴河詩歌 ê 聲 o-ló 伊。6 用號頭 kap 哨角 ê 聲，Tī 君王耶和華 ê 面前出歡喜 ê 聲。7 願海，kap 其中所充滿 ê，lóng tiòh 出大聲；世界，kap tiàm tī hit 中間 ê，亦 tiòh 出聲；8 願大水 phah 手掌，願 chiah-ê 山 tī 耶和華 ê 面前出歡喜 ê 聲。9 因為伊來 beh 審判全地；伊 beh 照公義審判世界，照伊 ê 正直審判列邦。

共同經課-3 約翰壹書五章一節～六節

1 見若信耶穌做基督 ê，這是 tùi 上帝生 ê；koh 見若疼生伊 ê，也疼 tùi 伊所生 ê。2 咱若疼上帝，koh 守伊 ê 命令，就咱 tùi án-ni 知咱疼上帝 ê kiá<sup>n</sup> 兒。3 因為咱守上帝 ê 命令，這就是疼上帝；koh 伊 ê 命令 m̄ 是重擔。4 因為見若 tùi 上帝生 ê khah 贏世間；也 hit-ê 所以 bat khah 贏世間 ê，就是咱 ê 信。5 khah 贏世間 ê 是 chī-chūi ah？kiám m̄ 是信耶穌做上帝 ê Kiá<sup>n</sup> ê mah？6 Chit-ê 耶穌基督是 tùi 水，tùi 血來 ê；m̄-nā tī 水，是 tī 水也 tī 血。

共同經課-4 約翰福音十五章九節～十七節

9 我有疼 lín，親像父有疼我；lín tiòh tiàm-tī 我 ê 疼。10 Lín 若守我 ê 誠命就 beh tiàm-tī 我 ê 疼，親像我有守我 ê 父 ê 誠命，tiàm-tī 伊 ê 疼。11 我已經用 chiah-ê kā lín 講，beh hō 我 ê 歡喜 tiàm-tī lín，亦 hō lín ê 歡喜滿滿。12 Lín tiòh 相疼，親像我有疼 lín；這是我 ê 命令。13 人為 tiòh 朋友獻性命，疼無有比 chit-ê khah 大 ê。14 Lín 若行我所命令 lín ê，就是我 ê 朋友。15 Ta<sup>n</sup> 了後，我無叫 lín 做奴僕；因為奴僕 m̄ 知伊 ê 主人 ê 所行；但是我已經叫 lín 做朋友；因為我 tùi 父所聽見 ê，lóng 有 kā lín 講。16 m̄ 是 lín 揀我，是我揀 lín，koh 設立 lín，hō lín 去結果子，koh hō lín ê 果子久長 tī-teh；hō lín tī 我 ê 名，無論對父求甚麼，伊就 hō lín。17 我用 chiah-ê 命令 lín，是 beh hō lín 相疼。